



08054

北山文集卷之八

宋鄭剛中撰

郡後學胡鳳丹月樵校

梓

三葉

擬策進士

問郡千里而爲之守邑百里而爲之令非一日也守令得人則千百之間財用可足盜賊可去禮教可興不然華轂朱輪銅章墨綬掛朝廷法令於牆壁間負上多矣諸生咀嚼仁義研弄翰墨他時入官固將持橐簪筆爲瀛洲文人必亦有志於撥煩然不擇事而安之者臣子之節萬一分符拜印受一方之託則建立治功不可使與武夫法吏等財用以何道而足盜賊以何術而去禮教以何修而興願雖施設之權臨時自有次序然亦不害爲有司逆陳其端

問朝廷者天下之根本得賢宰相則朝廷治郡邑者朝廷之枝葉得賢太守焉則郡邑治二者不可偏也雖然人材難得久矣鼎足三公方面刺史豈得皆賢必不得已則爲官擇人之際先宰相耶先太守耶論其提綱振領則宰相之選恐不可緩論其臨民親近則太守之任又在所先諸生當天下多事之時聖

卷八

北山文集

一

退補齋藏板

主一旦諏訪羣策下迨布衣則論將安出

問內志正外體直審而後發者射之事也故射可以觀德而古之爲士者習焉今之爲士者不然誦詩讀書玩弄筆墨朝夕之所從事者未聞以弓矢爲急也今國家正當講武修戎之日彼挽五石之弓雖非識字書生之事然先王六藝之數當亦闕一不可又況習而精焉則內可以成己德而見威儀上可以壯國容而張武備顧不韙歟今欲上於朝而頒其法於天下諸生以爲宜否

卷八

北山文集

二

退補齋藏板

問周官之書理財居其半財用在先王太平之日尚不可緩况夫用武之時乎兵法曰興師十萬日費千金斯言信矣國家自祖宗以來二百年以仁恩德澤涵養天下每歲取其常賦惻然猶恐斯民之匱比歲虜人入寇深及東南天子選將練兵而貔虎之師動以萬計縣官供給其費不貲府庫無私藏之錢天下無助邊之粟將盡取於民也則民力重困非國家之福不取於民則飛輓饋餉誰其給之諸生將應秋詔不可以虛言苟進當有長策深籌可以流錢地上者

告於有司

問詞賦之學前世有之國朝行之爰自王氏專門指
爲雕蟲之技請於朝而罷其科今者有司春詔旣復
用此矣而取人之制尚與經義參行夫科目旣殊師
承各異喜經義者必謂詞賦爲破碎尚詞賦者必謂
經義爲迂闊二者不能無異也然槩以至論則果孰
優而得人之效後日亦有輕重否諸君考古驗今併
言其畧

問孔子謂羣弟子曰以吾一日長乎爾無吾以也居

卷八

北山文集

三

退補齋
藏板

則曰不吾知也如或知爾則何以哉此蓋使子路之
徒各言其志也蓋人之平居鮮不以窮賤拘繫不及
施爲恨自顧其中徃徃皆有他日欲爲之志旣得位
矣亦未必皆能有爲良可長慨諸君生文明之時適
艱難之會所謂風俗之利病時政之得失人才之臧
否與夫還兩宮之策平僭竊之謀殄夷狄之計皆在
羣居議論中但朝廷未及知故懷材抱器者未及有
爲爾自此入官從政應聘而起若孔子所謂如或知
爾則尊君強國之術由輩將何以哉

問唐太宗臨朝謂侍臣曰朕爲天子常兼將相之事
侍中張行成極言其不當與臣下爭功由是觀之委
任英豪付以重柄巖廊之上談笑而俟成功者天子
之事縱橫方畧非所知也及馮異爲光武言則曰以
詔勅戰功每趣如意時以私心決斷未嘗不有悔則
明謨廟筭又當自九重出所謂臣下者姑奉行之爾
嗚呼用兵者帝王之重事何在昔君臣論議之際反
覆不同如此其遠也國家運適中微否極未泰談兵
講武正其所急信如行成之言也則主上聽政訪問
之餘自可遊神淵穆責將帥以成效攻守形勢不必
問也如其不然則馮異豈能無望於吾君乎執經侍
講之臣亦宜取古人得失之迹啟沃於冕旒之前而
諸將出師之際畫地聚米宜亦先賜臨軒之問矣諸
子以謂如何

問爲學者以經術爲宗爲政者以法令爲本二者殊
途也故善爲學者未必能爲政能爲政者不必在於
學此傳籍之所載古人之所有可考而知也雖然子
皮欲使尹何爲邑子產至有操刀製錦之譏則欲善

其政者不可不求之於學至漢薛宣有言則曰吏道以法令爲師可問而知則爲政之要或不在于學矣二者常竊有疑不識有官君子陳力就列之際施爲注措其果有待於學乎將文學政事不相爲用而書生之空言無用於臨民治物之際乎試辨明之

問疆場之警頻年未已虜人恃其彊黠復須使者而邀重幣如聞朝廷具貨賂遺樞臣又將卑詞而予之聞之議者頗謂順從虜意則無厭之求萬一難給抗章論列亦動冕旒之聽夫金虜之強盛也而國家適

卷八

北山文集

五

退補齋藏板

漠災之厄氣弱力微將不與之耶狼貪虎噬何所不有勞軍動眾塗炭生靈異時之禍可一二鑒也將與之耶野燒漏卮何時而已欲之無窮供之益困後日之患未易言也廟堂之上聖君嘗胆賢相痛心夙夜咨謀當有至論然學者亦不可不知願言其策

問漢高天下之英主也班固天下之良史也以良史之筆書英主之事宜其萬世燦然以余攷之頗有疑者沛公之先入關也項王豺虎之威意在不測項伯夜見張良具告其端遂免鴻門之殆彭城之西固嘗

不利而丁公弗之窘問兩賢不相扼之論脫之使去
項伯丁公是俱有德於高祖者也然有天下之後於
項伯則封之於丁公則戮之是何所施同而所報者
異耶平生所憎者莫如雍齒以其數相窘辱有故怨
之深此羣臣所知平生所惡者莫如邱嫂以其憂羹
糠釜無長者之風此布衣之恨雍齒邱嫂是俱有隙
於高祖者也然有天下之後於雍齒則先侯之於邱
嫂則至其子猶未望也是何所負同而所報者異耶
將孟堅編叙得於傳聞容有未審耶抑亦聖君之行
事自有深意不可以常情料之耶諸生留心經史有
日矣試爲辨我疑焉

卷八

北山文集

六

退補齋藏板

間除戎器戒不虞雖萃亨之時有所不免而謂艱難
之時可以忽畧兵制者無是理也國朝之制兵屬樞
密院移用進退朝廷主之今爲密院者實不主兵諸
將各擁眾號軍不可移用而其眾又皆寇盜兇猾之
夫勢如豢養虎豹常懷咆吼決裂之憂此豈經久爲
國之道哉故余嘗謂諸將皆如今日懷忠尚義慕子
儀光弼之爲人而以再造王室爲心則可萬一他時

倉卒之際檄之不來驅之不動懷姦相視莫可誰何
當是時不知朝廷何以處之虎臣矯矯決不至是然
理之所在不可不慮試條其利便可以經久施行者
著於篇

卷八

北山文集

七

退補齋
藏板

北山文集卷之九

宋鄭剛中撰

郡後學胡鳳丹月樵校梓

與梅和勝

某頃坐茶毒冒昧以銘文爲請顧母氏餘懿雖當爲
大筆所播傳尙慮執事以某不孝荒謬凡今日禍災
窮困皆其自取無足憫憐而拒絕之八月十三日吳
彥成附致所賜緘書文字等縷縷誠懇無不充足是
夜率諸孤於柩前號泣拜頌翌日付鐫人載諸嘉石
謹以短書一通隨石刻持獻具于別函少見卑懷荷

卷九

北山文集

一

昆補齋
藏板

載之意伏望裁覽

與章少董

伏自清漣岸下挽舟一別今已六年書問不相通者
亦許久蓋身在溝壑袞袞流轉無日不爲窮愁所役
所以懷想雖勤而候問之禮無從可致也別後竟不
知守官何地中間粹中始謂得薄海鹽是何棲息之
卑也仕宦不能自售者大率如此第學者有薄祿可
食隨小大以利澤及人不與俗吏俱化便自可喜然
少董亦何所不至耶如聞兩失賢助且未得子良爲

在懷某今亦三十五歲矣前年既奉母氏歸土壑家
入浦江作學堂教人子弟匏繫踰年遭阻克盜苦險
百端歸尋故居化爲瓦礫鄭氏非命者以數十計坐
此艱難胸中荒落諸況不復云也今日得便稱遠而
不肖來日欲道衢信如蘄春行李亦忽忽此猶未既
所懷爾幅紙數字因風亦有望於故人云

答范茂直

晚來雪意已成客子畏寒懶出坐馳高論忽被密帖
承尊候萬福深感深慰某嘗謂有人持一鉤之絲坐
沮洳之上雖未得魚然魚之小大已自可見操長竿
巨緝睥睨東海而立者雖未知所得何物然其人決
不爲蝦蟇科斗而來也區區所懷如此餘俟面列以

盡

與潘義榮

某今年正月十四日在梅蘄州座上讀邸報見書館
新除大用欣慰伏惟神明俱贊福順交集公少年取
巍科而涵養器局一洗時病校讎小寵未足爲賀第
芸署所藏非人間書想其咀嚼攬取日以增積他時

卷九

北山文集

二

退補齋
藏板

施設運動福利生靈者今皆可得而充矣歆仰歆仰
某伏自閑闕忽忽歲月鄉里盜後禍患百出去年於
母氏墓園之旁編蓬爲居且此收召魂魄今春道江
南入蘄春見和勝得一書與婺守求試漕司到鄉已
爲他人所先雖守二似有那融之意正恐難必齒髮
暮矣黔驢之技轉不似前故人聞此尙當千里相憐
也未參悟問千百愛重

與周務本

某命薄骨寒春試文字有司復不喜試後傷寒萬死

卷九

北山文集

三

退補齋
藏板

中得生閏三月十九日纔能抵家日欲通致一書又
念敗北而歸有辜平時賞激之意簡牘難自文飾每
臨紙而不敢書比見浦江士友所被之帖傳問之言
番番有之然後知某雖奇蹇無能而公尙愛憐未弭
也與深中此身又復流轉不敏之罪未有面叙之期
執筆慙汗而已

與張叔靖

某自去歲奉別謁竄偷生百無足道今年夏不再薄
土礮惡粒穀不登場淖糜不給懷抱亦營營爾所幸

村野孤寂俗客不到門癡坐觀書可以百日不出每
念睽闕之久欲作一書苦無便有便興盡輒已亦恃
叔靖道眼無礙千里自能相照也今日天寒得酒歡
甚亟寫此書憑季弟達之并有一詩奉寄區區之懷
悉具於詩故不多及

與潘義榮

冬寒伏惟使節按行之暇尊候萬福某去年羈旅臥
病出京時如醉夢中人雖不能道一語而別然依戀
之心猶能扼以東歸到鄉之後氣蘇意念念在中都

卷九

北山文集

四

退補齋
藏板

荷眷存非一旋承擁旆淮東稍施所學見之政事日
欲爲賀謝之書而窮居孤寂寡便未能左右平時懷
憂國憂君之意今者朝廷輟於文書鉛槧之中俾爲
部使者則一道吏民當被厚賜某技窮退屏百念灰
廢惟俟故人袞袞光大剷除蠹弊休聞拭目得再見
三王之治快意而死如此而已其餘祝頌不情之語
不敢道也

答姜秀才

昨日承訪逮副以長牋叙致勤誠感何有也嘗謂求

師固難爲說尤難吾子以退之師說見告請復得以師說爲謝柳子厚謂魏晉氏以下世蓋不事師唯退之奮不顧俗作師說一篇以勉誘後進然猶召闈取怒不已況餘人乎今之晚學在里巷中團聚小生以所不知更相授受不龜之藥賣不百金至於挽人而售之使人輕慢而不知尊非徒自輕亦輕道也故予深以爲戒又自知學術荒淺幼年貧甚不得專精於學獨受性愚狠不甘爲龔俗羈紲故銳致讀書今方枝窮退屏無所成就正不敢導人以所短也去年吾

卷九

北山文集

五

退補齋藏板

子過聽狠謂可從之遊自顧有不可得而辭者故得數相往來磨琢甚樂今年予旣多事而吾子似亦抗走營營意謂秦青之歌已得之矣豈敢竊竊然挽而教之也此無他不敢好爲人師而已長牋之臨方知有幣帛不至之歎無乃失所疑乎圖裂地而取封意豈在於百哉紙窗竹屋之間時得賢士顧訪商確今古抵掌一笑政窮人之所望也屬嗽疾作苦奉報草

草

與潘令衛

午刻尊候萬福前領薑母百斤且勤枉過他出迎肅
不迨蠶老葉忙詣謝亦復不果當蒙亮之苗已出土
而園丁不識薑性盛介切告頻遣至看覩合作如何
培養祇自備人工爲之左右當不使其有半塗之廢
也已有折簡之約更不圓封切望照恕

答潘叔豹

叔豹吾友辱誨字承日來所苦不衰使人執書慨歎
久之失意遠歸貧病如此其何以堪來書謂夏初一
書往復之後無一字相及視安否如秦越疑若有之

卷九

北山文集

六

退補齋
藏板

然自揆於心則有說夏時旣報來帖家人就蓐小子
生不旬日以毒瘍化去家人憂苦成疾盛暑中子死
妻病百端煎悲八月十三日遂般挈還金華到家則
官中征羅絹紬帛免無錢里胥每登門徬徨無所出
坐此懷抱無一日好然念吾叔豹之心則猶夢寐不
忘也數日前郡中見章子云曾得左右書具言體中
未平欲附藥去又不知近來疾狀如何相對憂慮得
書始大驚懼爾平生友善相知如左右者有幾尙期
他日相扶行道萬一終坐坎墮則桑榆暮景鷄黍往

來冀終此身公何謂舊約之易寒如此乎乍寒病人
易覺增重惟寬心調治某更數日定走左右面叙此
不多及媿媿悚悚

與潘義榮

前日奉詢帖已登輿就道紙筆不便不皇報謝拜賜
而歸媿不自安古文尙書孝經實所未見開卷一覽
如聞琴瑟鐘磬之聲而字畫奇怪氣象深穩又如今
人中見古人也幸甚幸甚越夕伏惟治行之餘尊侯
萬福左右取科名十年矣行已趨操士大夫雅論高

卷九

北山文集

七

退補齋
藏板

之今日之召正當國步艱虞之後非獨朝廷責任於
公者甚重而有識之士所以相望者亦不輕矣切須
據發所學力救今日之弊某窮頓之身不能奮發見
之行事然竊嘗思之爲治者貴乎知大體毛舉細故
非所急也蓋治道之外繆如人之有疾病元氣虛耗
根本搖動者病也瘡瘍癰疥見於皮膚者亦病也若
元氣充實足以滋養肢體則瘡瘍癰疥無自而作有
亦隨手平復苟元氣中潰則其外雖充實光潤終亦
僵仆而已矣國家累年綱紀破壞風俗頹靡小人方

且上下欺慢種種兒戲當時如取元氣向絕之人飾其衣冠傅以粉澤而指爲姣好賴天地宗廟之靈於未僵未絕之間扶而起之此大幸也竊見比來諸公施設政事雖未敢加衣冠粉澤於病人之身而目前所留意者已在瘡瘍疥癬之末所謂元氣之未還也漫未省也嗚呼於今日國勢一變之時扶之不正過是恐難爲力矣左右亦有意於此乎元氣之還不還在小人之去不去雖然小人非能盡去也堯舜三代之時所用者豈能無小人要之君子勝而小人寡治

卷九

北山文集

八

退補齋藏板

既積久小人革焉故不害爲治歷代衰弱之際所用者豈能無君子要之小人勝而君子寡弊既積久君子微焉故不害爲亂今日朝廷之士小人雖未能盡去要當使君子之道勝相與講求大體其不係於人心之去就者姑且緩之俟氣充力強之後徐徐施行未晚也苟坐視元氣之耗獨尋癥癘不平處把抓以塞責他時當復有飾衣冠塗粉澤以相欺者矣義榮前日又謂所見必言之言而不合則去愚恐此論過矣大抵獻言進說要當使實利及人得虛名而輒已

無益也蓋一人之尊不能獨治故委之宰相宰相又不能獨爲也故託之庶僚人君有所未省宰相則論之臺諫則論之宰相有所未省庶僚則言之臺諫亦可言之上下相規期在於得其是而已矣使皆爲義榮之說則言而見從固大善一言不從委而去之庶僚持此以事宰相宰相持此以事人君尙誰與求治乎彼仲尼孟軻亦何爲而徘徊於諸君之門也願義榮直其道而平其心婉其辭而和其氣君相之間從容贊議共進君子去小人勿相與把抓癩癩以塞責如此則天下幸甚朋友幸甚屬以告別無緣再詣道中千百加愛

與潘令衛

城中款晤甚慰卑抱繼皆族人詣門下不值而還逼於日暮不遑奉候也移昔伏惟萬福示諭創立義社招募武勇此二事與某謀合大同而小異然須得太守決意力行則利博而功大行之不決則此論近乎迂闊此某所以懷區區而不敢獻也五馬固不識之聞頗好言采善然亦不能專主昨日又歸與諸公議

卷九

北山文集

九

退補齋藏板

之大凡行事須出於誠意乃見功效借使條陳利害以兩事進之太守太守聽而欲行之又一人持異說搖動其間則吾事沮矣蓋獻說者多而太守不專聽故也某徐思之與其懷高論而不得施坐視其失曷若以此策斟酌行於一鄉保全里社尙爲德不細春塘之人素歸重左右若還此相與防捍盜賊暗消奸雄使更相視效彼此聯結亦可外助太守也專人布露更在詳察

與葉彥法

卷九

北山文集

十

退補齋藏板

伏自癸卯告別迄今六年中間二三書相往復之後音耗不通矣懷仰如何卽日秋深氣爽福祿駢集紳笏之榮實所忻快異時小人根連黨結欺慢君父己覩顏受祿又盜其餘霑及婚友市恩之罪天未顯戮而附炎得志者方沾沾自寵正如得盜財爲盜役而自以爲得志也留守宗丈懷志秉節於眾人憂危撼動之中忘身勇奮脫天下生靈之急傳之後世可以贖今日人材猥倣之羞是雖竭美官高爵未足報稱矧坦腹其門學行兼美如吾友者受朝廷九品官不

爲忝矣每欲以數字馳賀又念前日無書問往來一
旦見人有名稱便奉竿牘此正世俗之薄習故因循
至今左右鑒其忠否前月緣幹抵城似聞里巷有不
慙遺之嘆繼見宗學士起復之詔方知果然留守丈
晚節騰奮草木知名無所愧恨第可爲朝廷惜不敢
爲左右及闈內孺人之弔也京畿闕在何時美赴有
日矣否某窮居如昨進取事的不在懷但得四野安
靖保守松楸盡讀未見之書爲樂亦大他無足云也
未聞蓋練器業前報寵休

卷九

北山文集

十一

退補齋
彌拂

與張叔靖

去秋握手無十日從容之歡隔闊相疏已抱經年之
恨矣因循度日治問不時則公與我均有懶病可不
怪也冬序稍寒伏惟尊候萬福某自去年得瘧寒疾
百療不愈今年五月纔脫然窮蹇中病復苦之如此
奈何季平久在甥舍今挈家而歸想手足相得之歡
倍於疇昔爲別一年奇禍萬變使人嘗有卧不安枕
之憂吾生歲暮日斜所遭如此憤今懷古嘗無徒抱
何當密坐共開此懷未開千百壽重

答何元章

石季平過門奉誨帖并文字卽日秋暘明爽伏惟尊
候萬福山居和詩初無佳語推借過情非所敢望解
紛伽陀盥讀數過眞入道者之指南也敘述三詩之
意復撰成詩話一通再此寫呈非好辨也往反掌距
又且作得一篇文字亦可解頤否兩嶺礙人不得早
暮承顏傾倒日甚時因順風以片紙數字驚發鈍根
是亦教誨之而已矣邇來浮論稍定時事施行似有
次序貧者遂得力田場圃竊豐年一飯之飽萬幸萬
幸未參晤間惟善保寢興行迓泰來之福

卷九

北山文集

七

退補齋藏板

寄張叔靖

異鄉不得從容爲恨然家姪每得季平書則動靜之
祥因亦聞之潔已兄還舍授以華示伏承日來探道
愈深德履康固又得審問德粹奉議一房眷聚還自
江湖上下萬福宛轉慰懌某鑽頭書冊窮坐而老熟
見時事寢窘而憤結不平之氣無路可舒方日如游
鼎之魚不足道也得便甚遽捉筆爲問不多及

謝王文陳用中

十月二十四日戴秀才附到所賜緘書捧讀之餘悚然汗下何諸生未有一字見意而教誨輒已在門豈寵之以先辱之賜者乃所以開其不敏之罪歟加以提獎太甚禮數勤縟皆非門下生所宜蒙者私情媿惕良不自安忠孝互用之語此正爲頓挫之久內生靈霧一時用筆之誤掩瑕之德銘於肺肝矣

又

某自幼讀書竊嗜古人文章自舍法入學至癸卯漕臺試中間偶十爲第一輩行畧相推許年漸長身漸

卷九

北山文集

三

退補齋
藏板

窮則人漸輕笑而不與今年自顧齒髮四十有三世態欲危年益老而身益困所挾之技當亦不爲人所喜故決意退縮而婚友相挽使強顏有司不謂寸長遂有遭逢之幸雖然老而得此夫何足云尙恐失之東隅得之桑榆受知門下自今日始而已

與沈元用給事

先生譽望所以壓服人心者已在大名表暴之先旣歷清切則識與不識皆浩然屬望宣和甲辰某以浙漕薦書廁先生禮部筆硯是時固嘗微隨馬塵覘識

風采迨擁節南來卧鎮桑梓而某以奇蹇無聊之身
目託大庇念欲俯伏堂下一拜台光則貴賤相懸無
所陳說恐與旅進後生均冒典謁之誅坐以不敢前
今復道里阻修正遠旌榮瞻仰崇重不勝旦暮之心

又

東陽郡自去年孤危耗敝日可寒心非給事救護百
計則卽今耕鋤著業之民皆成盜賊而衣冠之士已
爲溝瀆埋藏之鬼矣雖然大人君子有康時濟物之
功而其身抱謗譏不明之嘆者古來如此執事以全
活千里生靈之德豈不足以塞二三萋斐小人行將
賜環前席付以大柄徵今日毀譽好惡之所親嘗者
而以公論進退人材使其皆得勉力就事則旦暮之
淹乃所以啓後日廟堂之業也

又

某疏賤寒生困躓場屋輒煩舉送適廬舍負郭稍遠
揭榜之明日趨走言謝值將兵告變關閉不得入後
數日再詣則已在邦人卧轍之後坐此參差不及面
奉一言之教心隨大旆踰日未收上賴台明有以照

卷九

北山文集

古

退補齋
藏板

察

答徐彥思

某正月十七日奉臘月十四日所惠教如獲對面審
聞尊候起居之詳慰感并集中都甲辰之別扁舟東
還塵埃萬狀不能以片紙奉高郵之問年來世事危
迫率不數日傳聞一變雖家居里閭而樸被束裝常
若流落之客前年冬始聞之官潯陽雨後遂不知動
靜蓋某經年不到郡城到亦早出暮還無從問故人
消息也得書始知周旋勞苦亦尙徘徊待次可量傾
倒彥思負持才術有素今日萬事顛錯不知當以何
道救之慨然憂傷必有康濟斯民之策如僕但能爲
時流涕爾去秋緣業未淨親友挽使作詩賦正以爲
慙無足道也一男子六歲二女子皆過十歲此曹相
催已成老翁田桑雖粗可衣食但轉手作事便覺窘
短來書乃謂近來優裕此語必自不相知者得之建
昌闕在何時未行間或尙須到城當探伺館舍上謁
數年相別之懷非握手促膝未易閒也未閒多愛

卷九

北山文集

五

退補齋
藏板

寄章少董

伏自疇昔一拜海鹽之問其後人事變更身計窮蹙
浮沈宛轉十五年間遂成隔闕雖書問不通於左右
然迫懷雅故一二於心想少董亦不爲蹤跡相疏遽
忘情睽也去年見戴元質話起居甚詳大足爲慰卽
日春和復惟燕居優游寢膳萬福永康舊歲爲過兵
所畧高居如故否生計當不至耗殘世態如此不知
以何道救之恐未易論也某困卧村野苟度光陰者
已四十四年蒲柳早衰種種情懶獨有鋤廩田園一
事尙須料理其餘不問也政和相從之樂礙隔於非
常憂患之前已成異夢念之悵然車馬何時能一到
城馳想之心尙幾少塞不爾傾嚮未易休也未間保
重

與薛世德

初二日一見不得款繼辱賜過復值出初三日薄暮
還家不敢扣門皆以爲恨冬晴得雨便寒伏惟靜坐
窮經其樂無量寢食休裕自可知也某抗走營營未
暇寧息湖上相從之樂念之難忘左右負材種學種
種高妙今暫不偶安知非後日驚人之漸不爲折閱

不售乃良賈之志也方時小寒柿紅橘熟園籬林落
之間奉板輿而游觀樂亦多矣某更三五日畧如浦
江月末或緣幹再入郡中當詣門一款會從可諸友
亦爲話此意也區區奉狀

與潘義榮

往者福慶嘗有唐鑑之約公今榮被除書卽造宣室
此書願如前言春首卻攜至會稽奉納荒陋之人熟
見古人用心處後日仰首伸吭不至以諛言鄙論玷
辱朋舊公之惠多矣

卷九

北山文集

七

退補齋
藏板

與張子韶

屬者天爲小人之私附大名之末爲幸甚至兩月之
間出均茵馮人承警教爲跡甚稔執事畧去聲勢垂
意延接所以相與之情比眾人加厚何感如之奉違
之日已見呼紹興迓吏意謂五月視事迨此孟秋有
自越來者詢之猶未聞耗傳者又謂體中嘗不平今
猶未愈坐貧不能專治問惟是瞻思之心夢寐不忘
湖山之西也近潘義榮得叔倚家問始知已至紹興
驚喜中草草具此託宛轉遇便附達蚤以數字相寄

要知動靜也某自離臨安至桐廬值大水開關山徑
五月半到家了人事卽閉門靜坐植蔬種粟以給鹽
酪爾後若衣食更無計則復如異時作書會爾他無
足論者俟知大旆所止卽旦暮跨驢款段上謁如向
來之約也餘懷非面不能具道臨書增情

答梅秀才

辱長緘爲禮過當屬歲除冗擾遂稽報謝中心慙負
不可言漢唐史家亦無本蓋少時已坐貧無錢買書
宛轉貸借手自傳寫故粗得誦寄記其後頻經兵火

卷九

北山文集

大

退補齋藏板

雖家藏古書散亡畧盡二史固不能保年來老大霧
霧內生舊學荒落二史非但無本其藏於心者亦捨
我而去矣吾友安貧力學談經之餘有志於此深可
慶慰殊以不及承命爲媿也雖然有一言敢爲吾子
獻或者謂經以傳道史以傳事此大不然使天下俗
學晚生知經而不知史者必此言也夫經曷嘗無事
史曷嘗非道道與事散於經史之間治亂安危存亡
成敗明聖仁惠昏蒙暴虐之君忠良俊乂奸邪險曲
之士靡不具道學者不可不知也崇觀舍法之弊肉

食鄙人倡爲膚淺之說學校之士從而聽之自本經
語孟子外盡指爲駁雜不純之書漫不加意間有論
議漢唐間人物者則朋友笑之師儒黜之曰是安得
麤拙之語故一時氣格意象熟爛委靡及化爲紳笏
貴人則進無保國捍難之功退無仗節死義之行此
無他無古以鑒今爾吾友今者漸能畏避俗學求味
古人內懷不自己之志豈患無書哉善學之士問其
有志與無志不問其有書與無書也昔人讀書不知
義者猶受書肆說鈴之誦苟堆積文籍而不能游目
於其間與無書等爾濟南老生未死尙書可以口傳
而滿天下漢唐史亦人間書爾心果慕之何患其不
獲蓬瀛道山異書與秩無不具有立身揚名自可取
而觀之恨無鄴侯萬軸之多不稱子雲奇字之問區
區更俟面言而已謹奉狀以謝

答潘義榮

某窮居村落坐廢時序疏遠執事惟日瞻思春雨微
寒尊候動止萬福比叔愚送到二日書捧讀感媿書
藁叔愚強取去不爲有玷清目區區之意初欲一鳴

卷九

北山文集

五

退補齋
藏板

後見時政施行自有次序不容更以春蟲之聲煩聒
天地遂收藏不敢出寵借之譽非敢當也鄉里今年
盜賊竊發頗聞司諫移害就利常有裨於太守信仁
人之言哉某比於圃中創小亭名可友今以小記奉
呈暇日能以一詩光之否時危此身尤覺如影泡一
室猶傳舍顧方爲安居計者此亦一日非葺之意也
福慶之約慮使堂偕行難以趨詣不爾則同叔愚自
山間逕道可以一日之款區區奉狀布謝

與范浚明

卷九

北山文集

三

退補齋
藏板

伏自丙午正月蘭溪藏院拜違憂危艱棘擾擾四年
莫知公家弟兄所在日夜掛念非若尋常闊別之人
漫爲懷想之言也今年二月十六日始得寺丞之報
於淮甸來者笑而不信蓋進狩之時雖臣子蹂躪而
茂直明哲絕人於紛擾中自有保身之理又數日傳
者再三至憂疑繼之三月十三日義榮報甚詳乃知
果纏此禍旅櫬之還殯葬已畢痛哉何公家種惠之
厚而凶變遽及此耶豈緣業之會雖仁人智士有不
能自免也自聞此報痛在心骨但與賤累輩正當詭

言相驚之時坐貧不能城居惴惴村落頃刻不自保兼亦不知從人所寓含蓄涕淚茫然無起哭弔問之地可勝痛哉時事變更百怪並作日望材術之士如茂直輩力相挽救速成反旆之功而今又至於此極天意不可問也伏惟罹此手足虧離之苦友性自天愛何以割卽日感念之餘尊候作止蒙休城居每事如意否日來傳聞稍靜當少安心區區面列之情甚於飢渴屬蠶事正冗未能如願承教當以秋初爲約也謹上狀

答石季平

卷九

北山文集

三

退補齋藏板

某正初留寓門下甚久值軒蓋展親遂安不獲聞教被帖承還第之餘履茲春序尊候萬福蒙惠可友亭詩字字高妙不勝珍感近潘子賤范茂直惠到兩篇甚佳忽忽未暇錄呈也小亭殊陋而留語者皆高人筆第恐從今爽氣不在西山矣感刻之情非面不既上狀希列萬一

與陳去非

癸巳辟雍獲陪燈火其後閉關險阻垂二十年南北

升沈無從瞻晤今者偶以枯朽發榮而舍人方隱躋
清切正此騰上其爲幸會亦豈偶然屬坐愚拙人事
極疏得官海邦待三年之闕未有驅策之便爾臨書
豈勝增情

與凌季文

某鈍朽無堪得忝同年已大幸而臚唱之聲切聯高
躅於時但知參附爲榮而未知有相與之樂奉違之
後抗走營營倏忽歲月念臨安兩月之間辱慇懃而
蒙厚意者無所不至然後始遂然追思慨然相懷矣

卷九

北山文集

三

退補齋
藏板

敝居在金華最村處仲夏望中抵家應接人事畧遍
則閉門孤坐在深井八月七日田子侔忽附到數字
九月七日再得書發緘快讀旣知履此窮秋作止萬
福又知子韶動止之詳非尋常慰喜之心也季文醞
藉風流又名聲灼灼今只以幕吏待次何也豈造物
者之於寒士常有意相扼耶某自還鄉後夏不再薄
土旱失什五窘短尤甚前望遠闕日月不可勝計欲
從人干覓則面生慙熱公謂奈何季文生事當薄有
涯親戚間有可借力者否因書願見報也秋風益高

千萬涵養以茂遠業餘無足言者謹上狀

與張子韶

某奉違之久杜門深坐兀如枯禪九月八日領八月二十日所賜教大用慰喜子韶名塞天下前此謗論嘲毀闐然四起者物理之常然某嘗謂仕宦之初若便令俯仰柔順顏面可喜眾人憐愛如處子則他日恐無可觀聚罵招嫌崎嶇歷落偃蹇不仆者恐後日卻是硬腳根子韶以謂何如邱簽之事此間所聞又卻不然邱公聞甚長者迂吏不如法恐非其力至於邀官謗死之論政不自邱公起也願更審其所從來移怒懷鑄恐有鬼神交鬪之誤某素不識邱因所聞如此不敢不告爾某異時作書會養百指亦時作瑣瑣經營以紓目前今皆不復爲欲從人干覓則如有鬼神扼其咽使言不得發獨坐食以待遠闕艱勤甚矣儉懷叢結非面不能開也

答陳用中

九月六日領專書教誨周悉慰感并至某前此凡三問起居皆呈達否拜賜之明日卽遣內史書曲折盡

卷九

北山文集

三

退補齋藏板

如來戒但旋聞諸貴人紛紛就譴慮內史亦預其數
今日得渠報字始幸不爲虛行但云文字諸公自春
夏之交已爲有力者所取不能自效又文書填委不
及報復長箋之勤內簡具言恐欲見今以封納才業
如吾先生朝夕便當衝躍恐亦無復作吏部錙銖計
也某夏五月還家杜門窮坐家貧闕遠且無攀援增
浩嘆爾手力晚到夜具書侵明卽遣不究所懷惟以
時保重

與章少董

卷九

北山文集

三

退補齋
藏板

某今年二月於令姪德文處領所惠教筆具審年來
起居之詳且承韜誨益深德行彌著蓬門高潔不見
風波反側之憂浩然馳想如見古人奉教之明日卽
如臨安不皇具報媿荷之意日對令姪言之某枯朽
餘生未流中偶叨紳笏無足稱道少董潛心抱器古
人有所不及而世無有知者見傅丈子駿數爲執政
者言之欲以鄉校奉逸其言竟未行德文少年力學
醞藉深遠定爲令器蓋家有名叔自當薰染如是也
霜風益高夢寐不忘君子之側仰幾惠令保綏別膺

殊命願望之切

答徐彥思

庚戌季冬邦佐附到其月十四日所惠教筆辛亥正月十三日具短書仍託邦佐尋便附上當不至沈墜旋聞琴瑟斷絃復抱閨房之戚驚悼未皇慰問而車馬不久亦爲江西之行人事交奪因循至今極深媿負冬序已寒伏惟治邑有道尊候萬福某衰朽餘生偶成戲事皆朋舊教督之力廷唱後期集百日司事旣罷隨例以幕吏出都蓋孤寒無援又同年二三公皆以鈍拙自信不能干覓所以至此還鄉夏時稻無粒可糜百事窘短爲況可知爾南城如何隨分安堵否賢者所至必理想雖艱危誅剝之中自熙熙爲樂邦也未間保重

與凌季文

十二月十日領教并信物等審聞履此殘年待次豐暇尊候萬福爲別滋久瞻念日深一郡之遙如在天角比得書來辭意委曲恍若半夜長廊夜半孤燈對話之時也承能增置屋賃少脫煎熬之患何喜如之

卷九

北山文集

三

退補齋藏板

吾輩前望官期歲月甚遠他無利害獨伏臘無計爾
今果經畫畧有次第高臥讀書豈不樂且休哉若拙
者殊未有策雖不至無飯可炊但兒女長大逼人新
春圖與四五友生入北山深處尋一書室爲長年安
坐之計他未暇置胸次也歲窮苦寒冰雪又作念與
故人握手一笑而未可得切幾益加保護以迎新旦
大來之休

與王子野

某去年道仙里雨中杯酒分散之後晚渡桐江風大

卷九

北山文集

三

退補齋
藏板

作道上漲水漫天迂回山間三百里凡四日始及蘭
溪還鄉日與人事相接遂不得附至一書謝前日過
門顧遇之勤負慙無地拜別風誼整整一年瞻跂之
懷以日爲歲念法慧兩月之間承顏接辭最辱厚意
紙窗孤燈長廊夜坐無復可忘自去冬卽聞美赴臨
安伏惟到官之初視事豐暇尊候萬福某蹭蹬之迹
百無足言仰首同年藉藉飛奮如子野高譽在人郡
幕小官豈能相留行見峻除坐卽清貴諺謂要得官
近長安公官守已得地矣相距正遠未有良晤之期

此心惓惓謹奉狀

答周希甫

某悚息他幅之問媿非所堪如希甫之政士民皆能
頌之不俟小人羅列以進也小官無大設施所先獨
廉勤二者既盡之矣夫復何慮承欲訪民間利病助
太守半年條具之目此尤見君子存心之美不爲官
職苟且之計必欲有實利以及人幸甚幸甚雖然民
之利病係於朝廷則可爲朝廷言之係於守令者爲
守令言之非無益也今之係朝廷者豈單言所能移
係守令者使守令得人則吾民自可一二訴而求理
矣敝鄉亦無甚利害其瑣瑣者恐不足以裨賢者之
聽容徐思之有所見當繼此以進

與戴端甫

自景德廡下一話遂別風雪滿道公方衝冒成行爲
之感嘆二月初見端修問公起居則云今復如建康
矣益相懷念二月末某病傷寒醫者誤投熱藥幾至
委頓不能行坐者四十日後來得公到湖所寄書始
知動靜且承勉從辟書俯就曹椽禮上之餘尊候萬

卷九

北山文集

三

退補齋
藏板

福入仕之初種種尤當戒慎端甫易得推情任意凡百宜少思之又前此奔馳道路汨汨不休他人或以爲言某獨知公母老而貧興國又未可赴雖經畫稍勞未爲卑也旣就祿矣太夫人在堂隨分菽水已是膝下無窮之歡正當靜養爲他日千萬里之計官職功名皆有定數頃勿忙也端甫人物高妙未可輕用朋友道喪久矣區區一言未必有補然設以苦勁取憎亦足以洗末世相諛之病端甫恕其愚否某今年復得少蠶兒女遂免號寒之患又與三四友生入北山深處治一小室尋未見之書讀之自可度日其餘惟俟友朋光大敦篤古道一援泥塗之困他無足云時益向熱萬萬自愛

答張子韶

二月二十日領所賜緘書是時病傷寒伏枕誦讀猶再過也某嘗觀古君子及當世偉人其躋清貴登要近者率須綿歷州縣親見民間情狀故他日運動天下薦進人材建功立業無不一當於人心近世文章政事分爲兩途朝廷貴人雍容高談指州縣爲猥冗

卷九

北山文集

三

退補齋藏板

之司謂非清選者所當與俗吏又謂非我無以辦事故貪污不法恣其所爲此風俗凋敝之由百姓困窮之本也子韶以文章名海內暫輟臺閣爲州郡幕官閱牘聽訟矻矻加意如積勞求進孤寒寸祿之人何其美也仰見設心措意常在於遠者大者向所謂綿歷親見者正高懷之所樂爾某杜門窮坐虛用光陰自春抵夏苦於多病稍欲觀書必倦乏而止亦福祿淺薄所致但村落間蠶熟麥秋春種已緣無憂矣因風未忘時賜鞭策

卷九

北山文集

三

藏板 長補齋

答凌季文

二月間叔倚附至緘書五月初義榮又附到四月六日所寄厚意薦蒙媿荷深矣卽辰暑雨未收伏惟遠業益茂動止愈佳某初聞季文能增置房賃有度日之計如已有之旋聞回祿一行一掃而盡今復窘短如故有自鹽官來者則云季文在鄉里不免圖錙銖以紓目前聞之使人驚嘆才名蓋世人如冰雪而使公爲是信乎貧之能累人也方欲附書奉勉作書會而四月六日之書已報越帥有謀授之請欣慰可勝

言哉某異時在鄉里衣食窘迫又不能借温於俗子
時亦營營自過省後卽不復爲今在鄉里教授四五
童蒙以所得添助歲租得亦不至闕食然自經費之
外謹不敢動殊未見有官況也一笑季文孤寒無援
亦與小人相似得熟忍貧賤此外無他術也陳仲文
諸公君試宗卿學官魁中皆所未聞殊荷見報同年
軒翔祇益歆嘆彥采近蒙幅紙之間荷意不忘有一
書附謝切爲辱佳便達之力行古道前副異寵區區
之願也

卷九

北山文集

三

退補齋
藏板

北山文集卷之十

宋鄭剛中撰

郡後學胡鳳丹月樵校梓

感雪竹賦

鄭子夜半聞風過庭竹細響浙瀝寒入茵被光在窗
壁晨興啓戶四顧皓然乃堦除之雪積也竹有高出
林表受雪既多壓而低者竿拳曲以屬地葉離披而
附枝心固虛而自若根亦牢而不移然不畏其寒而
畏其重頗見高標困阨之可悲余乃呼童兮假長鑊
之巨柄使盡力兮擊修篁之凍壓觀負荷兮類積羽
之將沈忽奮起兮信泥塗之可拔色娟娟其復淨節
落落以難合寒梢一伸所謂此君之風流自不可奪
也蓋其與蒲柳異類松柏同條遭玄冥之強梁兮雖
抑遏而謾屈分嶰谷之餘煖兮終楠蠹而不凋故積
累之勢暫可枉其直復還舊觀則又吟風而飄搖也
其在人也初如蔽欺之隔君子權勢之折忠臣其窘
迫而寒冷則夫子之被圍原憲之居貧也終則如浸
潤決去朋黨遽消其氣舒而體閑則二疏之高引淵
明之不復折其腰也雖然雲兮正同雪兮未止勿扶

卷十

北山文集

一

退補齋
藏板

漣漣之勢孰見猗猗之美在物猶然人奚不爾亦有窮卧偃蹇於環堵之間者誰其引之使幡然而起

秋雨賦 并引

秋雨踰旬門巷窮寂訟百愆之在身知再生之有德中夜感而賦之

維歲庚午白露戒之前夕燃膏不繼于夜未央非風非雷聲在四窗居士醉醒相半覺寐都忘橫枕聽之則秋雨之至於西江也盧仝之屋雜然以鳴原憲之樞颯焉而入橐駝之樹振舞而響動子猷之竹飄蕭而細集其初若有若無類李愬入蔡州之肅後則若馳若驟如光武破王尋之急少焉再作風松沸鼎山城百家想萬絲之斜溼居士耳受心感坐而嘆曰辰角未見孰挽河耶然資以入土者宿種欲麥待以流脂者大田有禾收豐歲之美利壓厲氣之偏頗薰嘉味於酒醴暢吾民之笑歌是皆助天地釀中和予不敢以爲多也爲腹疾乎入蒼苔於陋室乎將望舒得天澤之意而離于畢乎茲未必也化魚乎添柳耳乎將瓜爛文貝棗落青璣之實乎抑又何足惜也雖溝

畝之迅流猶河伯之未溢予貧甚而門外無裹飯以
來者知子桑之病未十日也然則予何嘆曰嘆陰晴
之遞見寒暑之易流也君恩重而身已老知己厚而
心莫酬行百里者信九十之始半失桑榆者亦何時
而可收雖使驟漂橫落者盡爲孤臣之淚猶不足以
定痛故不若息羣籟閑清夜庶予悲之少休

大易賦

并序

觀如居士既取漢魏以來易學參訂其說竊拾
餘意撰窺餘十五卷每旦又陳易書案上往復

卷十

北山文集

三

退補齋
藏板

論之作大易賦

風雨冥冥爐香晝清初被濯以危坐徐玩味乎義經
有奇偶兮探洛書之數有肩足兮具河圖之形彼連
山歸藏兮雖絕編之已久吾文王孔子兮尙端拜以
猶生祕七八而勿示著九六以通靈極三才而盡變
鬱萬化以含精得鬼神以至理發蟲魚之隱情聖人
謂象而用之必有物也故有以萬有二千五百二十
之數藏之於四十九莖大矣哉槩其凡雖曰潔靜精
微其教也乃若挈天地襲氣母者要不可以容聲揚

子雲之骨朽矣孰弔之曰此三大聖相授之妙而方州部家敢以準自名乎吃魄不能對有客出而難予曰子謂易不可談則今之學古之學也按隋經籍志自漢抵魏費直古文之訓康伯繫辭之作鄭玄之易王弼之卦合四家之注已二十二卷豈其皆糟粕歟諸授業師探微抉隱遠者稱聖雄者折人角河內女子亦得以說卦三篇補散落子患言之多曷不泛其浩浩而守其卓也予曰噫嘻客孰知無跡則橐籥虛竅多則渾沌鑿字三寫而烏焉不真詔再傳而唾劉

卷十

北山文集

四

退補齋藏板

皆錯是以說象則義遺論數則象格至有以龍爲驪羊爲羔果棘爲果墮是皆好奇之病無病而進藥又怪則五行傳會六情假託如蛇下梁魚入寺一牛兩首逆陳幸中僅巫祝之相若大抵春秋可以言災異而談諧射覆或流爲東方朔也客辭屈則拜而請曰先生之易何如曰我知我愚我戒我慧實擁腫之似而罔象之比中夜以興未明而起高揖聖賢如忽相值讀乾坤知覆載之恩推損益洞盈虛之旨恒則可亨蹇則當止謂中孚兮則好爵之可縻惟無妄兮則

勿藥而有喜既遠實兮斯爲困蒙矧考祥兮天常視
履壯兮則爲觸藩之羊睽兮則見負塗之豕危厲已
熏於艮背遲泥必成於遯尾故折獄致刑者豐之用
而赦過宥罪者解之理火在天上兮當出門而同人
天與水違兮作事而謀始飛鳥以凶兮蓋山有雷尙
口乃窮兮豈澤無水泰兮則小往而大來震兮則驚
遠而懼邇益戒顛頤無忘滅趾井念羸瓶鼎思出否
勿在旅以焚巢將濟渙以奔机卑以自牧立不易方
然後藉用白茅而爲慎之至吾之所得於易者如斯
而已乃若兼收象義精粗不棄窺竊眾說拾其餘意
肴藪同甘莫分彼是集而藏之所以備遺忘於衰齡
教箕裘於不肖之裔客勿視爲京郎之細也

山齋賦

觀如居士榜所寓爲山齋有叟趨其下仰而笑
曰名何謂是翁號書生頌嘗履玉階之方寸奉
天威于咫尺非山中之人今者囚竄正木偶因
漂南冠而縶非愛山之時前有謝亭長之閣右
乃見督郵之縣非居山之地名何謂趨而出追

問之不告觀如感而賦曰

予世居金華赤松之下深林豐草曠野平岡與而爽
動而藏初環翠以逼幽鑿嵌巖于邃府忽數峯之拔
起入寒翠于穹蒼蓋初平叱石之處孝標讀書之鄉
雖雲可耕也類子真之谷口而盤之樂兮無李愿之
太行矣有桑有麻有梨有栗吾非耕而佃則灌而
搨捐或無餌而釣寒溪或帶經而鋤晚日不知芟製
之異乎簪裾不知編茅而類乎營窟桃花飛花而送春
雪擁門而入室所以鹿豕不驚烏鳥相得蓋是山中

卷十

北山文集

六

退浦齋
藏板

之一物欺吾者曰爲儒要當釋屣作賦可以得官不
牧羊而隨人燒尾何爲守枯槁而遠長安也脫如豹
隱豈霧中許久猶未成乎一斑也盍亦捨蜩飛之控
地觀鵬翼之垂天乎聞而甘之炙背食芹誠忘其陋
不謂沐猴之已冠也奈何草茅之性終在烟霞之病
不痊服勞而力已朽願息而中愈頑雖侯與伯鶉且
特而憂悲眩視此心無一日不在乎山間果以滄浪
不濯之身負戴澤難藏之垢大不足以禦魑魅之祥
小不足以汙豺虎之口風靜雷收天高地厚爰葺此

居使韜百醜蓬蒿兮隱前松筠兮蔽後湖光兮蕩左
江聲兮注右賓客雖過于高軒書記不通乎下走藜
藟綦翳崎嶇截業蓋蠻洞丁之所雜蹂罪戾者居之
不妨戴隆恩于崧岱寄危根于培塿也寂無人聲柴
門書局隅坐一窗度秋林之策策如臨萬壑聽風雨
之冥冥掃庸神之滯困對孤爨之餘清盥瓶罌而小
汲雜茶薺以同烹問迷塗于貝葉窺奧義于義經是
皆追省愆尤收召魂魄處陰休影之地洒心修行之
庭彼何叟也謂吾小齋爲無實而名殊不知憂幽之
病旣定于中州縣在旁何落吾事不須笏以拄頰自
披襟乎爽氣故園之夢不生稚子之迎且置惟松楸
之悲或感動于造化則首邱而死尙有望于終焉之

計

卷十

北山文集

七

退補齋
藏板

北山文集卷之十一

宋鄭剛中撰

郡後學胡鳳丹月樵校梓

離平江

橋外客舟連夜發飽吹十幅風蒲滑天明無處覓高
城但見吳江波浪闊

讀光明經捨身品

摩訶薩埵眞奇特虎口捐身資福德卻有同時畏避
人後來亦自成彌勒

浦江道中

卷十一

北山文集

退補齋
藏板

驚憂度歲月靡覺佳序臨玉露破金菊方知秋氣深
偶書

何時見池館一二佳友生酣飲入深夜竹間燈火明
潞公與梅聖俞論古人有純用平聲字爲詩如
枯桑知天風是也而未有用側字者翌日聖俞
爲詩云月出斷岸口照此別舸背獨且與婦飲
頗勝俗客對大爲潞公所賞追用其語作側字

四絕平字梅花一篇

側字同仄

久雨閉陋室薜荔絡敗壘乙子語大慧我聽勿入耳

具酒作社飲此事古倡始孰肯具果蔬被肘醉子美
節物暗老我壯志特未已事業力自致貴賤命可委
案上具筆硯砌下秀菊杞我顧乏大屋尙賴有此爾
平字梅花

江梅非凡根先春花南枝玲瓏皆瑤英雕鐫誰爲之
天高孤芳寒風來幽香隨朝暎晞霜華蘭膏塗眞如
移之當疏簾吟腸清相宜吾將護花神妖紅徒紛披
何如令江梅芬芳無休時終愁芝蘭嗔侵渠名聲衰
得雨偶書

卷十一

北山文集

二

退補齋
藏板

夏暑踰秋驕未盡萬物皇皇久焦窘大雨一霑天地
涼星斗明煥草木潤

曉起

昨夜花間成酩酊今日天風吹始醒爐香深炷坐中
庭獨看竹梢移午影

夜坐

酒軟剛腸愁脉脉夜靜微風搖老柏七星插卯雲縱
橫月影昏昏半牆白

村居二首

山風拂拂墮松釵，午日亭亭覆矮槐。一睡閑名歸酒
盞，萬鈞清思入詩懷。

清心只有前溪水，息念唯憑一炷香。不覺青春倏過
去，滿村桑葉吐新黃。

浦江道中三絕

瘦骨巖巖禍患餘，追隨人事愈馳驅。何時洒掃松楸
畔，小蓋茅庵只讀書。

籃輿風緊揭疏簾，雨著春衣潤欲粘。滿眼陰雲壓平
野，此時懷抱惡憎嫌。

卷十一

北山文集

三

退補齋
藏板

寒梅蓄積香成蕾，古柳安排綠入緇。景物年年覺新
好，所憐幽獨白蕭颯。

寺前書院

竹屋紙窗無限好，觀書學字不妨清。誰知夜夢饒驚
枕，莊舄依前自越聲。

和季平哭小女時避地靈峯

荒山藤束木皮棺，見此令人鼻骨酸。自是香殤風易
剪，不須慙痛淚闌干。

退之赴潮陽喪小女於層峯驛
有詩哭之曰致汝無辜由我罪

百年慙痛

淚闌干

題後鄭壁

滿眼烟塵雜鼓旗，經冬首鼠負憂疑。
樹頭新綠今如此，辜負春光固可知。

題靈峯見山閣

兵火相尋音問絕，登高寓目空傷神。
金華山且望不，見況乃欲見山下人。

避方寇五絕

皇家休運正無疆，撼樹蚍蜉不自量。
未作天街一杯血，暫憑山谷恣跳梁。

卷十一

北山文集

四

退補
藏板 齋

啖惑愚民倚怪神，誅鋤當見不淹旬。
何嘗耳目親旗鼓，只是流離失業人。

朝廷平日祇尊儒，文武於今遂兩途。
聞說官軍又旗靡，誰收黃石老人書。

獵獵霜風捲地寒，狼星奮角夜漫漫。
書生無路堪馳騁，被酒燈前把劍看。

將軍失策又顛摧，感激令人動壯懷。
安得帳前圍百萬，悠悠旌旆夜銜枚。

卽事

梅子垂垂傍短牆
淡烟微雨暗池塘
年來日覺傷春甚
覽鏡歔歔淚數行

清明前十日大雪二首

五花素色逼窗簷
紙帳重將布被添
天爲韶陽太妖冶
故令剪水作清嚴

南山春晏蘼生芽
怪得清寒數倍加
一雪洗將紅紫去
高低林樹試瑤花

度金沙嶺

兩行古木影交加
山欲侵雲水見沙
最好嶺前鷗鷺

卷十一

北山文集

五

退補齋藏板

起竹林深處兩三家

渡胡源口二絕

暫出篋輿上小航
眼明重喜見江鄉
夢魂孤寄浪頭宿
一夜隨潮入富陽

梨棗迎霜壓樹黃
葦茅新屋漸成行
人情喜見兵戈息
路上時聞酒甕香

吳江有三高祠
謂鴟夷子皮步兵校尉角里先生也
先生一人題其祠曰是非名利等煎熬
見盡英雄兩鬢毛
自古五湖風月好
至今分付屬

三高因和之

外物由來如夢幻達人輕視等毫毛投身爲有區區者始覺諸公節行高

道旁贈梅花

一枝橫出小橋東凡木旁邊迥不同未肯臨風吐香粉先將蓓蕾試輕紅

蕭山老儒余志寧求拙庵詩爲賦之

紙窗竹屋閉幽深古木簷頭對好陰大巧家風祇如此世人何苦用機心

卷十一

北山文集

六

退補齋藏板

題橫溪坊客館二首

吹暖東風自不忙徐徐一例與芬芳輪皴倚岸老楊樹也向梢頭開嫩黃
朝曦卻雨作春妍綠嫩黃輕物物鮮村落可憐祇依舊稀疏茅屋起炊烟

春到村居好四絕

春到村居好茅簷日漸長杯深新酒滑焙煖早茶香
春到村居好園林興味長蠶貪桑眼出蜂趁蜜脾忙
春到村居好枯腸飽可圖笋尖將露角麥秀欲生鬚

春到村居好清明欲禁烟亂紅桃下雨輕白柳飛綿
呈周務本三絕

民因吏擾愈荒疲不得田園破一犁此邑端須知令
尹春來處處麥連畦

浦江方此幾人家生事高低各有涯安得巨靈開二
嶺放教仁術過金華
撫宇心勞清愈甚潔廉官小俸無多知公但欲邦人
樂雖瘦雖貧不奈何

偶書

卷十一

北山文集

七

退補齋
藏板

身名蹭蹬元無況杯酒流行強自寬夜半窮閣閉梅
雨昏昏燈火淚中看

休牧軒

自是牛圖不早傳向來牛鼻不須穿軒間縮手見真
意始悟控持非自然

綠淨軒

小小軒窗冷逼人竹無俗韻水無塵正如蘆葦瀟湘
浦不見樊然花柳春

水碓

遶岸車翻水碓鳴誰於春事亦經營斯民惜費蓋如此力役從今莫謾征

客夜霜寒

曉寒欺客人疏窗夢破江南一夜霜可但山林小搖落樹頭無葉可飛黃

貴谿道中四絕

人見寒雲凍欲垂喧呼爭願玉花飛誰知萬里征途上季子囊中未有衣

竹邊小徑跨寒溪息念臨流萬慮非山鳥不知幽客

卷十

北山文集

八

退補齋藏板

意背人相顧卻驚飛

村村土物各風烟物性無私祗自然歛翼汀鷗隨水下藏頭野鴨傍沙眠

晚投村舍款柴扉一望門前野色微西日墮雲斜照盡半山秋雨落餘飛

和張叔靖三絕

學圃自緣非肉食杜門誰謂避閑名大都野性如麋鹿不解將身朝市行

後生修飾正爭妍老者何顏與拍肩竹逕柴門閑深

寂嵇康只願得高眠
屋後瓜疇接芋區門前寥落鬪菴間
思癡不顧妻兒笑
依舊燈窗夜讀書

楊思恭惠酒作小詩戲之

炎炎酷暑日偏長饒吻常思累百觴
封寄瓊醅雖甚美一甕何以潤枯腸

讀蘭臺詩

并序

蘭臺先生常宿潯陽天慶觀有行年四十九還
此北窗宿蓋其地乃唐之紫極宮也李太白年

卷十一

北山文集

九

退補齋藏板

四十九時宿其宮常有詩曰四十九年非一往
不可復異哉先生其謫仙之後身耶先生遊戲
斯文談笑化爲珠玉誠不是塵網中來其德行
文學尙非太白所敢望蓋太白死垂四百年矣
英爽之氣太空閒陶鍊許久通明圓悟自應過
之因爲詩云

天遣長庚下碧空再將太白作坡翁不然安得四十
九還宿潯陽太極宮

每歲正月度太陽嶺半山間有梅花嘗以此時

開每見必折一枝內午歲成一絕

孤根抱石半巖生玉骨知春自發榮
我有此間來往債年年須挽一枝行

卽事二絕

春風盡日恣顛狂吹散遊雲夜月光
露帶清寒入花骨暗尋簾幕度幽香
暮春景物稱山家屋角團團綠葉遮
薄晚微雲疏過雨一番小麥顫輕花

偶成

卷十一

北山文集

十

退補齋
藏板

亂尋花木傍山栽雖有柴門未必開
過眼利名休挽我年來心地已如灰

聞百舌

圓吭百舌語千般豈是春來不耐閑
爲見幽人無與語故來相對作閒關

送季平道中四絕

霜風落葉小寒天去客依依馬不鞭
我最平生苦離別可能相送不悽然
與君今夜宿郵亭遲曉東西各去程
記取短橋攜手

處明朝都似夢初驚

田夫擊鼓祀田神盤案相呼盡欲醺我願四郊無犬
吠常令此輩樂耕耘
野蝶成團夾路飛秋郊此景最佳時寒梨霜柿渾無
葉綠橘黃橙半壓枝

次桐廬

回舟逆水甚徐徐尙距桐江百里餘只有夢魂無阻
礙夜來先已到吾廬

夜聞雪聲

卷十一

北山文集

十一

退補齋
藏板

怒號中夜忽收聲枯葉寒梢細細鳴曉起一杯簷外
立滿階無處認梅英

己酉立春前一日得雨時有百日之晴

陽春明日五更回破旱先令一雨來要得羣生蒙實
惠故將膏澤潤枯荄

二月二十一日枕上聞鴛時霖雨之後

山前急雨促春耕廢我倘徉小圃行今日定知晴有
意咤然林際一聲鴛

三月五日圃中

人愁春去少花枝我愛園林春晚時
嘉木陰陰吐新葉好風微度綠參差

己酉三月二十一日夜夢中作

曲闌干畔短籬邊用意春工剪不圓
一夜西風借霜力幽香噴出小金錢

王能甫作葡萄一枝於圓扇之上戲作小詩報之

妙筆窺天頃刻成渾如小架月初明
扶疏老蔓敷新葉下蓋纍纍紫水晶

卷十一

北山文集

三

退補齋
藏板

和元章春風三絕

方欣解凍入花叢
絞絞俄驚萬片紅
草木豈能勝造化
吹開吹落任東風

平分四序遞收功
豈但留情白與紅
莫訝曉來成謾誕
清微欲換舜絃風

一掃園林寂寂空
抱枝蝴蝶尙尋紅
摧殘老物無人惜
不比窮秋九月風

題西巖

終日徘徊得好涼
一懷炎暑變冰霜
會須月上出山

去更看芟荷生夜香

題雷石寺潤公環翠軒

窗外小山重疊好陰陰松竹翠排簷老人嘉我幽尋
意深炷爐香爲捲簾

宿鶴巖二絕

巍然山骨自天成上與穹蒼斗極平安得衲衣燒柏
子不聞山下是非聲

巖頭一望萬家低已覺塵寰不整齊此祗人間最高
處況遊物外照羣迷

卷十一

山北文集

十一

退補齋
藏板

夜寒覺有霜

不勝孤潔寒窗月分外清圓遠寺鐘後圃便當收橘
袖無疑侵曉一霜濃

至夜獨酌二絕

一冊韓文酒一杯居然獨酌興悠哉夜寒徑醉卽就
枕卧待新陽明日來

久苦羣陰不可排一朝驅退亦宜哉萬年誰上君王
壽爲奏門前欲泰來

雪後觀月

風高天闊淨無塵萬瓦生光冷射人不見曉來迷晚
雪但看霜月益精神

枕上聞雪聲

日落天風徹骨清疏疏玉片舞中庭夢回細響鳴松
竹誤作春蠶食葉聽

梅花三絕 并序

昔日多以梅花比婦人唯近世詩人或以比男
子如何郎試湯餅荀令炷爐香之句是也而未
有以之比賢人正士者近得三絕焉梅常花於

卷十一

北山文集

古

退補齋
藏板

窮冬寥落之時偃傲於疏烟寒雨之間而姿色
秀潤正如有道之士居貧賤而容貌不枯常有
優游自得之意故余以之比顏子其詩曰

溫溫玉質傲天貞俯視凡花出後塵靜對寒林守孤
寂有顏氏子獨甘貧

至若樹老花疏根孤枝勁皤然犯雪精神不衰
則又如耆老碩德之人坐視晚輩凋零而此獨
櫻危難而不撓故又以之比顏真卿其詩曰

樹老根危雪滿巔令人頗意魯公賢同時柔脆皆僵

卜正色清芬獨凜然

又一種不能寄林羣處而生於溪岸江臯之側
日暮天寒寂寥悽愴則又如一介放逐之臣雖
流落憔悴內懷感槩而終有自信不疑之色故
又以此比屈平其詩曰

水邊寂寞一枝梅君謂高標好似誰潔白不甘蕪穢
沒屈原孤立佩蘭時

和潘仲巖八絕

春陰

卷十一

北山文集

七

退補齋藏板

澹雲不雨翳朝曦簾幕沈沈燕子歸細起一爐香霧
潤猶扶醒滿怯單衣
露薄雲輕物色佳平平淡水映人家鳩鳴村暗開桑
葉燕舞風斜落杏花

春晴

午夢悠颺一蝶輕隔窗驚覺搗茶聲偶然尊酒得佳
趣半夜花間燈火明

青烟漠漠晝無人垂柳遮涼不見塵飲水曲肱眠細
草絕勝肉食坐車茵

春雪

天散琪花壓晚春，豈將災沴禍吾民。
爲嗔寶貨歸夷虜，故種人間萬頃銀。
冰柱垂簷雪滿山，今年寒食不勝寒。
何門可曳長裾語，高卧從教刺墨漫。

春雨

燕巢深條簾未開，柳添新耳雨生苔。
悲歌莫作子桑態，裹飯無人爲我來。

春風

劉郎桃樹欲撓春，一夜飄零最惱人。
不似窮秋作霜露，摧殘蒲柳有誰嗔。

八月初一夜聞雨

過山秋雨響臨池，深夜書齋枕獨敲。
正似蓬船倚江浦，夢回牢落聽潮時。

戲題秋香

香染鵝黃衣，綵繚輕披環珮玉。
交加異哉秋氣方淒冷，風露何能作此花。

獨坐

卷十一

北山文集

六

退補齋藏板

午枕幽禽破夢時
明窗過日竹陰稀
小爐翻轉香殘燼
猶有清香一縷飛

石希孟寄示賦論甚佳
有未盡善處
輒爲塗改
因成小詩寄之

寄我雄文麗且新
水寒於水豈無因
故將丹粉畫西子
要見濃塗淡墨人
南唐潘佑嘗從高遠學後過之然遠每見佑文必加塗竄朱銑無以鈐黃輒画西子因以濃墨復塗遠之淡墨焉

偶書

未抱床頭酒
甕乾暮來樓上倚
闌干濃雲垂地捲不

卷十一

北山文集

七

退補齋藏板

起細草連天都是寒

題石幾先書院壁

萬柄高荷碧玉圓
芙蓉時見一枝鮮
何年種此北山北
便向中間安小船

荷花

美豔向人花灼灼
青圓如鑑葉田田
月明徙倚闌干處
細得眞香憶去年

呈范茂直時在豫章

窗竹脩脩度晚風
濃香醇酒小寒中
玉人尙作桃花

色我輩蒼顏何惜紅

諸暨道中遇雪

亂花催臘舞江千村酒沽來豈問酸僊女雲間休剪
水孤松嶺上不知寒

卷十一

北山文集

六

退補齋
藏板

北山文集卷之十二

宋鄭剛中撰 郡後學胡鳳丹月樵校梓

臘月三日義烏道上寄潘義榮

天風生暮寒一夜新雪積遲明兀篋輿亂入山徑窄
茅簷兩三家鷄犬不見跡冬令頃弗嚴草木偃春色
愆陽入桃杏春暖浪蓋垢肅然變霜威犯者輒衰息
獨餘山上松不動與寒敵十丈偉標致四面風浙瀝
時於翠葉中碎掛瓊玉白忘我道路嘆但覺心志憚
擁鼻作孤吟清思浩無極

卷十二

北山文集

一

退補齋
藏板

陪權郡符正民九日遊西山

符公寄郡理犀刃不可觸白書庭無訟一切就整肅
秋風九月涼閒暇顧僚屬謂茲落帽會千載有賢躡
西山多爽氣盍亦具騶僕曉出古城隅薄霧隱疏木
乍見溪山明已洗簿書俗雲間阿蘭若小步徧深曲
逸興不受制更到卜之麓弔古動高懷臨風展遐矚
扶光迫西汜回棹泛清淥鉤簾陳密坐羅列進肴餼
賓客岸巾幘禮數免拘束時因笑語驚鷗鷺入蘆竹
導從偃旌旗城郭初燈燭我愧人物微情睠久虛辰

終日陪後乘可但玩黃菊亦復見民田枯結瘦無穀
那能給租賦止可縱芻牧吾民窘窮狀蠹損非一目
願施膏澤手小使千里足化此登高樂泮散入幽谷
盡令登春臺老稚同鼓腹公徐登廟堂摩天逞鴻鵠
下瞰清中原更作四海福

和趙晦之司戶三首

文士務悅目常患器局卑余雖嗜古勁而乏嫵媚姿
紬繹起深愧漸摩賴良規溫言謾相詠何以慰所思
吾子澤天潢努力能自效詩句如春風容易亦新巧
簡編多生賢要在謹相倣更願觀南山其中藏霧豹
老過日斜時貧唯懸磬室釋耒著青衫自顧亦何得
方作斗升計敢憚簿書役相觀摩善道正賴朋友力

寄題李監酒不俗閣

高士常徇俗無心欲違世野鶴在鷄羣飲啄同斂翅
昂昂望九臯自有物外意下士求免俗正恐俗難避
嫵母學西子象玉徒瑱掃低回雖斂容不改凡冗氣
聞君開小閣潔具高風致隨硯翰墨香雨帶春煙細
盡將窗几閑一洗簿書累漢有弘羊者權酤善言利

流風至今茲已作千古
樊君方聊爾爾升斗亦云寄
顧我困埃塵俛首甘俗吏
均是爲貧人噫嘻勿羞媿
送蕭德起赴召

中原八駿涉沙漠春風移十年

壯士磨寶劍怒氣常裂肝
荆湘跨閩浙米貴仍無錢
征求未可罷民力悉已殫
嗟我無遠識念此心獨寒
九重益思治久席坐不安
先生爲時起素抱今可言
治近與治遠二者將孰先
堂堂東海風千載猶凜然
餘芳勉自振家世無相懸
愚生啖寸祿州縣方連遭
感激欲起舞袖短無由翻
臨風重相別江湖催發船
送符正民罷倅永嘉

卷上

北山文集

三

退補齋
藏板

去年斂板趨庭側門前楊柳如金色
今年公去柳何如已作涼陰舞
寒碧歲月忽忽無足恨離合人生那
免得身如汀鴈偶相逢自是不須論
定跡我今胡爲抱不滿攀轅益爲邦
人惜永嘉雄望城海濱吏久不
良民弊積年來開府皆鉅公
旁助剗除知有力歲當乙卯夏
不雨旱霧吹風千里赤
愛人節費惜錙銖廩
庾單窮猶足食北方興師日
千金州縣皇皇慮供億

博哉時發仁人言未至取魚憂竭澤青衫幕吏有何
能造物見憐相技拭自知愚拙生霾霧臨事昏蒙無
遠識天機遇觸狂態作招鼻我眉成痼癖唯公道眼
借餘青頗許披心露真率人生感恩未易言正恐不
能同木石仙才秀骨公所有化作文章可華國持身
況若玉壺冰透裏無塵只青白誓分半刺聊爾耳此
豈能令公議塞行當擺脫州縣冗下跨秋風開六翮
夔龍有室俱可入願吐詩書資碩畫自餘強飯無足
云轉首潮平江樹隔

卷十二

北山文集

四

退補齋
藏板

贈周希父

憶昨被嚴召同時具行李海風九月寒孤翮相次起
扁舟下雙溪鼓棹共秋水覽勝定徘徊得酒對歡喜
欲將骨髓奇先後獻天子六馭駐松江端門晝高啓
披雲就堯日五色炫光煒孤根際春陽生動自茲始
掄材有時相小大聽所委茵馮忽東西分此舊窗几
公居陋室中屋壁初料理人靜夜燈孤葉動聲入耳
數日皆大風簷冰凍相倚坐想髯鬢逸清吟不知已
慎書緘錦囊莫貴洛陽紙

丁巳年七月二十一日禱雨中元水府八月六日展謝祠下皆被旨也然禱後越七日始雨神所爲耶其不然也審自神出不無愆期之尤有如不然神之饗上賜也多矣爲詩以問之

奉祝出閭闔禱雨祠中元陳祠信已薦拱俟心亦虔山雲屢觸石散去如飛煙慙衷迫秋陽汗流頸徒延趨起念亡狀歸馬不敢鞭雲臺欲旬浹蹇兆方解懸皇慈喜嘉霑報貺禮弗偏謂乃百神功共相成豐年遣昨致祠吏奔趨各如前我載謁水府意惑口莫言

卷十二

北山文集

五

退補齋藏板

黃屋四海心責已湯未賢抑畏動黎庶精誠格高圓正恐三日雨帝勅下九天神令享豐報然乎其不然貪功認有者鄙賤人所憐神聰冠四瀆宜弗蹈爾愆益思贊元化後效圖所先小臣此將命芒刺終未捐

送宋叔海郎中總領湖北

余生得奇疾傲世事矜錯落氣少合指謫心不恕人亦謂可憎不作朋友數自分與西山終焉約良晤憶昨奉嚴召孤跡踏朝路楓落吳江冷此是識君處東廚竊餘餼西府共官署文書入同閱茵馮出聯馭

從違一毫髮所適無異趣重愧牛鐸凡不與黃鍾注
霜蹄入天衢先我呈遠步所幸時從容一笑或相遇
君今持使節忽此戒徒御分袂固良苦餘懷尙能布
北方晴虜馬君相勤遠慮正當收杞梓留作廟堂助
何爲使吾子千里治財賦蒼璧白鹿皮似亦失所措
君如玉壺冰透裏無滓污清詩近道要容易不肯吐
人於寸管中時見斑一露其如濟劇手妙敏難悉疏
刀硯未輕發干牛已神怖使圖中興業吾知有餘裕
無乃上流勢貔虎夕屯聚三軍儻不飽難以責堅成

卷十二

北山文集

六

退補齋
藏板

千金日致之又懼民生蠹聊煩笑談頃非君可誰付
長江八月風帆飽舟楫具結束持行李功名戒遲暮
如聞豫章北下接武昌渡公餘一尊酒時可對親故
孰與紅塵中輪蹄日馳驚嗟余蒲柳姿領髮已垂素
雙溪有小園清流鎖煙霧年來枕邊夢合眼見鷗鷺
奚堪久勞役短豆成戀顧不待相汰逐襍被行亦去
今茲懷別恨密坐不能訴酒闌可無言君行已稱遠

送方公美少卿宣諭京畿

春風入江南紅蒸小桃坼亞卿何壯哉持節使江北

牙牌刻金字黃旗書御墨奉將出雲天萬里布恩德
十載分三光河洛鬢霧黑夜泣孤鬼魂毒貫生靈臆
胚胎此禍者起自燕山役今茲欲澄明造物豈易測
關中幾萬人性命懸兆億虜雖識天意按舊反圍域
聞其所車載取及墓前石民間一尺布持去如卷席
蓄盡脂與膏遺我百州骨嗷嗷萬孔瘡後望沐天澤
江南今復貧萬室生理迫瘠此欲肥彼又恐非得策
使者宜孰先第一安反側不須增甲兵當務修稼穡
聲名無欲夸奏報須盡實隨宜養官吏著意看蚤賊

卷十二

北山文集

七

退補齋
藏板

偏私生忌讒戲怠藏隱隱舉手從簡易慎勿耗民力
要令鄧禹車到處便休息九重愛物心八荒欲安宅
行行致功名男子惟報國

胡德輝郎中由禮部出守桐廬同舍取劉禹錫
移石幾回敲廢印開箱何處送新圖之句字分
爲韻某分賦移字

春風吹楊花楊花亂江湄中有使君船雙橈倚漣漪
少駐一盃頃容我成此詩人生天地間用舍當聽隨
棟幹無衰氣匠石寧肯遺姑存萬牛力輕重惟所施

方公在瀛州眾論稱瑰奇圖書浩探討笑閱寒暑移
取作南宮郎漸欲爲羽儀雍容入青瑣人以旦夕期
承流急師帥小試煩一麾淮陽正不惡安用薄彼爲
第令牧民心常如護嬰兒休息戒擾動飽煖毋凍飢
清淨乃要道中庸亦良規桐江古佳郡幽勝公所知
一水綠浩蕩千峯影參差鳴鳩桑葉暗雨過稻花垂
不妨乘事外時訪巖陵祠囊中得新句因風寄所思

紀關隴

十載三光分號令南北阻四達禮義鄉限礙成蠻楚

卷十二

北山文集

八

退補齋藏板

帝王豈無真社稷固有主機槍不待射避路過河澣
職方閭輿圖十已歸四五窮民病巨瘡延頸待摩拊
子翼上所親暫輟自應許詔書下雲天所至若甘雨
車前拜且迎稽首立如堵無家不壺漿有市皆肴脯
葉底窺烏鵲墻頭出兒女其中老人者橫涕自相語
脫命向鬼手魂魄掛網罟豈料須臾身復此見官府
願上萬萬年左右常伊呂護持三綱全保我在田畝
予前拜老人愧謝難縷縷塗炭置赤子不痛非父母
如問嘗膽心念念惟率土驚風吹胡沙北望曾後汝

成功當問天字養難用武今茲結新權不試師一旅
開籠出飛鳥汝亦良得所予獨顧秦關異世目可睹
郊原掌心平猶是周廡崗巒抱河洛四面踞龍虎
惟時蓋世英制馭立區宇不應移造化私用貯狐鼠
見還雖必然永保更精處銷兵開造兵欲取必知與
吏良民自安德盛豈招侮道義尊本朝好約信強虜
整頓天地間事事皆就祖吾民百憂足可使再辛苦
冠巾作人家耕鉏飽禾黍會須太清塵一掃淨千古
茲行豈不勤道里以萬數見公自清涼蕭然失袷暑
日隨下幕吏一馬行似舞月明見旌旗夢寐聞簫鼓
聚火餅肥炊漿酸粟饒煮徧覽江山勝膈腹浩撐拄
不見少增重政自太無補

和李公實郎中燕歌行

李侯氣爽常清涼上奉慈親髮垂霜弟兄如鳳皆翔
翔秋吟胡爲慘中腸白雲孤飛客他鄉然此王事游
有方晏嫂老醜勝空房我獨熊膽念莫忘已無針線
在衣裳歲歲臨風感清商侯門忠義慶綿長象軸金
花當滿床板輿歡愛未渠央倚門亦莫苦相望樞密

將春布岐梁

和公實書懷

學古謾拙僻高談成繆悠吾今百念冷泛泛如虛舟
參佐託裴度道路無一愁願同陳元龍時卧百尺樓

答江虞仲機宜歸語

侯公說行高祖迎趙璧在懷出秦庭白首屬國還漢
旌印綬纍纍妻嫂驚疏家叔姪辭公卿彭澤柳外陶
淵明又如長鉞成悲鳴沂浴旣罷風舞輕斐然成章
孔不稱浩然之志孟豈平登山臨水賦有情回船上
馬詩句精又如虜營之氣已見華山之馬將逸邱園
之夢欲成天際之舟可識其在今茲則還報王事秣
馬脂車與離長安之日

金房道間皆蠟梅居人取以爲薪周務本戲爲
蠟梅歎予用其韻是花在東南每見一枝無不

眼明者

邊城草木枯散漫惟蠟梅花蜂不成蜜深黃吐春回
如行沙磧中眼明見瓊瑰初謂此邦人推爲百世魁
文房與幽室佳處定使陪羞死蒺藜類屏置山墻隈

事有大不然驚吁謾徘徊頑夫所樵採八九皆梅材
餘芳隨束薪日赴煙與埃曲突幾家火靈根萬花灰
我欲從化工緩語搖頰腮天涯有清客不善爲身煤
鮮鮮犯霜露且且斤斧摧寧若橘變枳甘心擯長淮
今渠負幽姿風韻元不類胡爲雜榛棘僅與樗櫟偕
謂工爲垂手毋令識者哀

再和

我賦蠟梅什吁嗟何獨梅天衢誰謂高富貴容姦回
世路可憐窄巖穴定奇瑰劉蕡策如虹李邵方爲魁

卷十二

北山文集

十一

退補齋
藏板

漢帝稱盛禮太史不得陪楚亦多大夫靈均葬江隈
天馬繫四足悲鳴謾徘徊楠楠遇拙匠血指成棄材
高岡鳳鳴資竈下隨煙埃泛觀無不爾何歎花爲灰
我欲勸處子無庸畫紅腮我欲勸朝士無庸巧相媒
時來鷄犬仙夢去金石摧置器戒如斗酌酒當如淮
陶陶醉鄉中壯心休自頽小視造物者令與兒輩偕
浩氣塞天地容易母悲哀

送陳季常判院

去年奉使天西角遇事才疏多自覺不應尙或人改

觀增重端因君在幕君才如刃新發硌到手萬牛體
髀落豈能隨我困邊微定自搏風上寥廓峽東秋江
風浪清美君出峽舟楫輕去年聯馬聽簫鼓今也恨
不同此行古人持兵喻槃水顧我何者能獨槃幸留
藥石苦資助勿謂相捨真忘情

送周務本機宜

霜風吹西湖與君持行李瘦馬共邊笳寒燈對孤邸
新涼秋葉驚歸櫂君獨理棄我天一方穩下六江水
丈夫志四海吾豈較遐邇行藏天所爲況自非偶爾

卷十二

北山文集

十一

退補齋
藏板

獨憂綿薄資負重力難起嘉賓日以遠緩急尙誰倚
置此勿復論遇坎各有止我積漢中穀君種彭澤米
努力隨小大同在毓生齒他年脫冕歸對酒各懽喜
送何元英

乙未夏入秦馬足臨渭水辛酉冬使蜀去渭亦無幾
君於兩年間同我二萬里我今寄戎閫君復持行李
客衣掛塵埃閒關亦勞矣垂髫讀詩書平視取青紫
側翅隨人飛此計寧得已人生功與名天付在男子
有物執其柄小大聽所委請君但強飯加意重生理

見蛻儻弗駭換骨正刀匕青春到邊城雜花亂如綺
儲粟三百萬護種一千壘日與諸少年醉卧春風裏
行行勿我念峽東江未起辦事早言還下榻當設醴

寄別張子公尙書

昔我初至秦使旨不到蜀延首錦城春千里寄孤目
速公今出峽賤跡仍羈束夢看使君船翩翩轉江曲
西州去思者何啻連萬屋攀轅猶弗還我意豈能足
所憐蜀人病羸骨未生肉公兮胡弗留共與營糜粥
自惟救護心寢食對溝瀆回顧莫有助此志亦單獨

卷十二

北山文集

五

退補齋
藏板

公兮那得留峽水峻而速蚤去登堂廟大作天下福
病身鷄肋瘦別恨容千斛勢須更勉強渭上幾一熟
郡縣減苛賦廩庠貯餘粟便當乞身歸徑去友麋鹿
類試院放榜眾論以得士爲慶作古詩一章呈
詳定錢憲元素及同院諸公紹興甲子十月二
十八日也

書生業辭藝不爲覓科舉胸中負器識筆下有今古
君看阿房賦豈是布衣語獨其在糊名貴賤惟所主
得之類至寶棄去祗如土有司開化爐鎔鑄要精處

時方爲鼎鑪小治不應鼓諸公皆名流學海浩吞吐
丹靈骨先換入榜盡龍虎訪以執文柄我以費羅取
書生家風寒僕馬在何許跣足赴重圍裹飯坐長廡
視公簾幕間若有霄漢阻那知先達心每事必念祖
未把短檠乘尙記燈燭苦關防周鑄隙考校到毫縷
雜置戰場文一字不輕與如持古黃鍾端坐分律呂
在處拔其尤可但十得五奉此賢能書足以上天府
蜀士多豪英父老自能數謂或有遺珠勉使相接武
我輩酒尊空邊城隔煙雨

卷十二

北山文集

古

退補齋
藏板

北山文集卷十三

宋鄭剛中撰

郡後學胡鳳丹月樵校梓

送樓仲輝知温州序

某與舍人樓公鄉井學校硯席所業經幼時無不同也故欽慕之心爲久且親至其聚散出處之跡則常不及同焉政和辛卯某不得爲鄉貢士而公升禮部越二年癸巳某以貢士不得第而公奏名矣是其初已不得同也其後公歷仕路翱翔二十年而某以布衣窮悴亦若是之久中間自覺如水禽浩蕩見人卽

卷十三

北山文集

一

退補齋藏板

飛自然相避是其後又不得同也紹興丁巳公爲左史舍人某適爲西府屬官省戶邸舍隣比意謂異時學校之歡可尋矣而公乃謂名不可以獨享將有忌而爭之者束手藏筆六請君相鼓棹一笑而扁舟已在大江之外矣至於今是又不可得而同也噫聚散之異乃爾耶雖然初不得同則業不侔也後又不得同則命不侔也二者皆非策蹇所及今所謂可得同者則暫而已矣門方吹竽操瑟焉往眾求鼠腊懷璞安之如某失耕鋤之利而從升斗廢山林之夢而觸

爲是耶赤松生春雲吾其望故廬而歸
矣公 二十年之雅畧去名勢鷄肥黍熟相
與開書論古今慨興亡而浩歌則後日之樂庶乎其
可以同焉俟他日有翻然出爲天下之志則予當起
彈其冠

韓孫小名序

詩曰棠棣之華鄂不韡韡箋謂承華者鄂也鄂得華
之光明則韡然而盛亦猶弟以欽事兄兄以榮覆弟
恩義之顯詩人興之余既名叔義長子爲華孫今有
弟焉可爲韡孫

蓬孫小名序

章郎生子之月余新除監察御史書至其家德文小
名其子曰臺孫邢郎生子之月余以祕書少監出陝
西得詔遣書見報且請小名其子余名之曰蓬孫烏
臺少蓬皆借外祖官他時兩孫長大登科書小錄能
念老人否

胡仲容屢隱序

木偶困漂古人所嘆蓋流落羈寓終不若里舍田園

之樂也鄉士胡仲容不見且二十年一日相訪臨安
問其所止則曰買居華亭勞以羈寓流落之語則仲
容殊不領方從容謂予曰華亭之居前名之以隱隱
後榜之以茅蘆置其間者皆書史圖畫琴瑟筆硯之
類與之遊者皆邑之賢士大夫予聞其言始恨慰勞
之語不應爲仲容發也大抵學者急於修身身修則
無往而不得其所仲容去桑梓而無羈寓流落之色
買居清閒而有里舍田園之趣蓋善修其身者歟雖
然修身不可一日怠也君之告我者果信也則書吾
言於壁而益自勉焉

送井都運出峽序

自古理財佐軍興惟劉晏有功於國晏之爲財可計
乎曰專漕事歲置四十萬斛曰榷鹽歲收六十萬緡
曰用常平法諸州米率有三百萬之儲用是三者操
其低昂故自見錢流而舊史謂爲管蕭之亞西南被
兵而來理財佐軍者其入數可計乎曰用糧則歲食
一百六十餘萬斛而糴居其半曰用錢則歲支三千
萬緡不啻而鹽酒稅亦半之心勞力苦皆有功於國

然而以罪廢以病免以憂死不得善後而去理財之數過晏遠甚而名稱不得與晏齊何哉蓋晏繼第五琦之後其所羅取徧江淮非若今日東不出陝西不至涓培聚腋削垂二十年未已者止蜀一隅受之其不晏若者如此晏專以懋遷爲術而佐以禁權諸州儲米復周流出之以救所無今所以取蜀者旣倍越常賦而粟帛之征責辦於鉤鎌機杼之間軍猶以愆功告無餘資可以貸匱矣其不晏若者又如此江淮之財轉以輸軍舟車可致故庾有粟帑有金則官不

卷十三

北山文集

四

退補齋藏板

復憂百姓不復知非若蜀道險巖推挽不進萬山之間急流盤屈舟破米沈則追逮填塞無有窮已其不晏若者又如此今昔之勢不同如是尙安得與士安爭名乎況復印紙爲幣取於民與真錢同用於市三幣僅比一真取數愈多用數愈賤軍不加裕而民益貧主計者以廢以免以憂死無多怪者吾友憲孟大監以材能任用自維揚受命入蜀爲帥爲漕再爲四路轉運副使其理財佐軍之日心勞力苦比他人獨久且多紹興甲子代者合符治行有日某命酒酌而

賀之曰右護軍十萬眾劍內外分戍之供饋散取諸郡而艱難之狀如前所云支出愆後則諸營已無炊煙雖婦人女子亦譟而出此皆異時已見之事若乃馬嘶塵起關外有急則芻糧倉卒頃刻有禍宜乎主計之官不得善後而去今憲孟俛仰數年軍中飽暖如一日申酉之役重兵夾輔成功不以無食而還大將裨佐卒隸今皆願留不可得公乃乘春水未滿之時舟楫告具浩然望三峽嘯歌而出勢如釋縛解繫而就安曠豈不樂甚矣哉又再酌而言曰憲孟去無負吾軍矣然則蜀人思之乎曰思則吾勿知也大抵吾民之財憂危取之則彼輕安樂取之則彼重朝廷方爲生靈偃兵蜀人但知閉戶休息以補養累年剝剝之痛往時襍被抱子驚恐相問之事今已忘之矣而乃謂軍籍增倍備禦不可廢取財猶如故幸一旦舍籌算而去尙安爾思乎或者士大夫之思在其後所未知也憲孟安恤此酒闌舟動子行矣

烏有編序

長短句亦詩也詩有節奏昔人或長短其句而歌之

被酒不平謳吟慷慨亦足以發胸中之微隱余每有是焉然賦事咏物時有涉綺靡而蹈荒怠者豈誠然歟蓋悲思歡樂入於音聲則以情致爲主不得不極其辭如真是也毛居士逢場作戲烏有是哉輒自號其集曰烏有編

忠義堂記

永嘉州治之北有堂曰忠義前太守程公之所建也紹興丙辰端明殿學士禮部尙書會稽李公來鎮是邦既見吏民間疾苦頒條教約與爲清淨之治一日

卷十三

北山文集

六

退補齋藏板

過其上顧謂僚屬曰是堂規模閎偉而創立命名之因無所稽考吾聞魯公唐人之英言忠義者莫先焉後五世流落爲溫人魯公末年親書告牒其家傳寶之郡嘗爲刊於石爾者天子官其家永嘉者二人家樂清者一人所以彰遺烈而播餘芳者多矣雖魯公之名所在咸仰要之此邦乃其遺跡流風之地吾今求其像繪置堂上徙其石刻列之兩旁使後人知堂名之有屬公等以爲宜乎幕吏東陽鄭某避席改容而言曰真卿小邾子顏公子友之後自顏含爲晉侍

中相傳七葉皆以忠孝名世至有唐真卿杲卿以堂兄弟門戶並立杲卿常山之名既凜凜如霜雪希烈之變真卿復振顯於後天其以忠義萃一門乎嘗考魯公上世凡能盡忠於國者無不以孝行稱由是知善爲臣子者於忠孝之道初未嘗析後世道德不純風俗凋落臣子分兩途始以忠義爲難事至若魯公處死之節論者倬之而識者猶以爲不足道觀其平日議論慷慨落落難合唐旻誣之李暄非之李輔國元載盧杞輩怨恨切骨而公益自信知愛君憂國而不知禍之及已此蓋能以事親者事其君故也忠義天下之大閑也偷生假息固可以延亂臣賊子之命而英聲偉烈常出於姦鉄逆鼎之旁二者唯人所自擇而已矣公爲政之初暴揚茲美非但可以慰顏氏之精爽亦足以銷杞載輔國千古糞壤姦人之氣其誰曰不宜公曰眾以爲宜則子爲我記於石

溧水縣學記

九州之俗非大陋鄙未有不樂教化崇學校者溧水縣學建於熙寧己酉邑宰關祀爲政之年至紹興丁

已邑宰李朝正謁廟之日學所存者僅惟門殿梗莽
頽翳蕭然煨燼之餘李侯延長老問之曰邑萬戶俊
秀可儒雅者宜眾其不相與出力飾新茲廢者豈薄
子弟乎長老愀然進曰披猖而來邑政之廢甚於學
田桑不殖賦取不均餅間糠豆不能飽文書至門征
所無則憂苦無聊勞吏爲無計今獨幾得良令求生
全他未皇也侯聞之夜不能寢旦起治政事謂隱租
匿役邑之大弊置度立程若將廉治者欺吏悍民咸
歸誠自出邑賦大平於是富者安貧者樂婆娑從容

卷十三

北山文集

八

退補齋
藏板

皆於暇日問孝悌忠信爭先爲之長老又進而言曰
公向謂廢而不飾者今茲敢請侯卽日爲率僚佐詣
荒宮經營四顧默有區處則退而市材鳩匠以繩墨
授梓人俾次第旁屋皆以舊殿爲制爲堂爲廡爲樓
處土之舍寓賓之次器用之庫庖福之所外至小學
爲屋一百八十楹自經始距紹興十年二月丙午凡
二十有八月而落成皆廉用積餘植仆補壞而爲之
者士旣鼓篋上丁釋奠升降拜起人方知在儒雅教
化之中而輪奐鼎新之自初弗知也嗚呼家有塾黨

有庠遂有序古之制也而夫子答問之言則曰既富矣又何加焉曰教之故知學校之興必在富庶安樂之後苟斯民終歲勤動不得養其父母雖有庠序其得遊之此邑長老之意也雖然韋布之士羣居於詩書禮樂之府漸染以仁義中和之澤他日得時行道與夫朝廷取以備公卿百執事之選者靡不由此以出侯既稱長老之意則所以待邑士者今無不至矣邑之士所以自待所以報侯者猶未能知也侯名朝正字治表登建炎某年進士第

知旨齋記

卷十三

北山文集

九

退補齋
藏板

學記曰雖有嘉肴弗食不知其旨也雖有至道弗學不知其善也嗚呼古人能取喻如此世之甘糠粃齧蔬薺者雖五鼎七牢百珍八醬置其側彼未必以爲美者以其未嘗得味耳鄭自五季家金華皇伯祖中散洎先公奉議三數公皆涵泳儒學後世枝葉分派詩書凋零子弟用幹蠱克家其嗜以爲日用者或至食蓼忘辛而草編澹泊之言有在醫說間者矣某稟生竒孤耕無田居無屋見他人有芻豢雋永則染指

流涎不能自已故得粗見道腴無甚餒紹興二年既
登進士第至九年備數禁庭雖自知事業無以踰人
而人或不見謂不肖族兄信仲慨然嘆曰旨哉嘉肴
之肥人也吾知之矣雖然吾宗蕃大豈無醜醜酥酪
若盡取六經諸子之言設爲膾炙以作成其美則他
日饜而飫之者何獨弟也哉於是卽舍之東偏闢館
聚書教其孫子而使某命名焉欣然援筆誦禮記而
榜其齋曰知旨

思耕亭記

卷十三

北山文集

十

退補齋
藏板

紹興十二年十二月上命川陝宣撫司自河池移治
利州示休息兵革裁省用度之意本路轉運判官兼
權知利州事王陟乃移治城南虛其郡舍而宣撫使
居焉舍在城之西北隅有亭名清暉築于城上郡山
東嘉陵江峻潔于其前亭蓋以是名也歲月久深榜
目已廢規樞冗陋土木垂壓轉運公治而起之某一
日置酒其上會賓幕問曰茲亭新矣吾以思耕易其
故號可乎客疑而進曰是於亭何義且強而仕老而
休一犂谷口之雲於公豈不甚樂然公方爲上經理

西南斯民日幾阜康不思以此報政而歸耕之思乎
某曰噫嘻豈爲是哉覽長江之險思營田之利予實
有感於斯亭夫嘉陵之源發於鳳之大散旁由故鎮
繚繞漁關循崖而出力未能載自漁關下武興浮三
泉南流二百六十里至於亭下又順流踰劍入閬東
走安漢疾趨于合之漢初已則會東西二川併勢望
夔峽之道爭門而出回視漁關不知其高幾里皆終
歲漕餉之所浮水旣不得平流皆因地而淺深自艱
瀕逆數至漁關之藥水號名灘者六百有奇石之虎

伏獸犇者又崎嶇雜亂於諸灘之間米舟相銜且盡
犯險率破大竹爲百丈之筏纜有力者十百爲羣皆
負而進灘怒水激號呼相應卻立不得前有如竹斷
舟退其遇石而碎與汨俱入者皆蜀人之脂膏也小
人恃有此頗復盜用官米度賊厚罪大則鑿舟沈之
歲陷刑辟與籍入亡家者亦累而有故漕粟之及漁
關者計所亡失常十二吾然後知田之不可不耕也
武侯以草廬素定之畫頻年兵出皆以食盡而歸則
西南漕餉之艱蓋千古矣吾君誠心善鄰邊鄙不聳

命中外以寬厚之澤蕩洗煩苛塞卒十萬今皆橐弓
捲甲而臥吾誠能借其餘力雜耕關外率以平歲縷
田爲準不計狼戾第得粟一鍾卽減漕粟三鍾之力
俟諸營儲食能如晁錯所謂足支五歲則時赦農租
當下天子之詔凡此皆某臨流之所深念者賓幕聞
而稱善某曰謂吾言善則願與公等勉之紹興十四
年七月日記

卷十三

北山文集

十一

藏板
退補齋

08054

